



SLUŽBENI GLASNIK

UNSKO-SANSKOG KANTONA

Godina XI - Broj 11

15. juna 2007.
BIHAĆ

Izdanje na bosanskom
jeziku

189.

Na osnovu člana 1. poglavlje IV i člana 11 b) odjeljak A poglavlje V Ustava Unsko - sanskog kantona - prečišćeni tekst ("Sl. glasnik USK", broj 1/4 i 11/04), Skupština Unsko sanskog kantona, na 7. sjednici održanoj 12.6.2007.godine, donijela je

ZAKON O ORUŽJU I MUNICIJI

I. OSNOVNE ODREDBE

Predmet zakona

Član 1.

Nabavka, sakupljanje, držanje, nošenje, promet i prevoz oružja i municije, kao i način postupanja sa oružjem i municijom, obavljaju se pod uslovima utvrđenim ovim zakonom.

Odredbe ovog zakona ne odnose se na oružje i municiju za potrebe oružanih snaga, policije, kazneno - popravni ustanova i drugih državnih organa i pravnih lica koji oružje nabavljaju i drže po posebnim propisima, kao i na muzejske eksponate.

Odredbe ovog zakona odnose se i na strance kojima je odobreno stalno nastanjenje ili

privremeni boravak duži od jedne godine, ako međunarodnim ugovorom nije drugačije određeno.

Značenje pojedinih izraza

Član 2.

Pojedini izrazi upotrijebljeni u ovom zakonu imaju sljedeće značenje:

1) oružje za ličnu zaštitu su pištolji i revolveri kalibra od 5,6 do 12 mm;

2) lovačko oružje je oružje predviđeno odredbama Zakona o lovstvu u F BiH ("Službene novine F BiH", broj 4/06);

3) sportsko oružje je dugo vatreno oružje glatkih cijevi do kalibra 12 mm, olučenih cijevi do kalibra 8,61 mm, odnosno 0,338 inča, kratko vatreno oružje do kalibra 11,43 mm, odnosno 0,45 inča, pištolji i revolveri velikog kalibra podešeni za sportske svrhe, malokalibarske puške i malokalibarski pištolji i revolveri kalibra 5,6 mm sa ivičnim paljenjem sa olučenim ili neolučenim cijevima, vazdušne puške i vazdušni pištolji i revolveri i oružje sa tetivom, kao i drugo oružje koje se koristi u sportskim disciplinama;

4) trofejno oružje je vatreno i hladno oružje koje se čuva kao uspomena, koje predstavlja lični ili porodični trofej vlasnika;

5) staro oružje je oružje koje više nije u upotrebi, oružje koje ima istorijsku ili umjetničku vrijednost, oružje koje je sastavni dio narodne nošnje, oružje koje se pali kremenom, fitiljem ili kapislom i drugo vatreno oružje, osim vojnog i policijskog oružja koje je dotrajalo i neupotrebljivo;

6) kombinovano oružje je oružje sa dvije ili više olučenih ili neolučenih cijevi različitog kalibra;

7) kratko vatreno oružje je oružje čija cijev nije duža od 30 cm, a ukupna dužina ne prelazi 60 cm;

8) dugo vatreno oružje je oružje čija je cijev duža od 30 cm, a ukupna dužina prelazi 60 cm;

9) oružje sa repetirajućim mehanizmom je oružje kod kojeg je nakon ispaljivanja svakog metka potrebno ručno, preko mehanizma, ubaciti metak u cijev;

10) poluautomatsko oružje je oružje koje je nakon ispaljivanja svakog metka ponovo spremno za ispaljivanje iz cijevi jednokratnim pritiskom na obarač pri čemu je moguće ispaljivati po jedan metak;

11) automatsko oružje je oružje iz kojeg se jednokratnim pritiskom na obarač ispaljuje više metaka;

12) registracija oružja je unos podataka o oružju i vlasniku, odnosno korisniku oružja u službene evidencije propisane ovim zakonom, kao i propisima donesenim na osnovu ovog zakona, uz izdavanje odgovarajuće isprave (oružnog lista i odobrenja za držanje oružja);

13) isprave o oružju su: odobrenje za nabavku oružja, oružni list, odobrenje za držanje oružja, dozvola za nošenje i prenošenje oružja i odobrenje za sakupljanje oružja;

14) odobrenje za nabavku oružja je isprava o oružju na osnovu koje fizička i pravna lica mogu nabaviti oružje i steći pravo vlasništva na oružju;

15) oružni list je isprava o oružju koja se izdaje fizičkom licu za držanje, izuzetno držanje i nošenje oružja iz razloga lične zaštite, držanje trofejnog oružja, kao i za držanje i nošenje lovačkog i sportskog oružja;

16) odobrenje za držanje oružja je isprava o oružju koja se izdaje pravnom licu za držanje oružja;

17) dozvola za nošenje i prenošenja oružja je isprava o oružju kojom pravna lica koja posjeduju oružje na osnovu odobrenja za držanje oružja, radi obavljanja poslova za koja su registrovana, ovlašćuju zaposlena fizička lica da mogu oružje

nositi ili prenositi do područja i prostora koje čuva odnosno štiti, kao i u drugim slučajevima kada nošenje i prenošenje oružja nije regulisano posebnim propisima;

18) držanje oružja je radnja koja podrazumjeva posjedovanje oružja na osnovu oružnog lista na način propisan članom 39.ovog zakona;

19) odobrenje za sakupljanje oružja je isprava o oružju koja omogućava fizičkom licu (kolekcionaru) sakupljanje oružja, bez prava nošenja;

20) nošenje oružja je radnja koja podrazumijeva da fizičko lice ima kod sebe oružje spremno za upotrebu;

21) prenošenje oružja je radnja koja podrazumijeva da se oružje koje se drži na osnovu odobrenja ili odgovarajuće isprave o oružju, uz prethodnu prijavu nadležnom organu, može prenositi u slučaju promjene prebivališta ili boravišta fizičkog lica, odnosno promjene sjedišta pravnog lica, popravke ili prepravke oružja, smrti vlasnika, odnosno korisnika oružja, odlaska u lov, na sportsko takmičenje, na streljiste ili u drugim opravdanim slučajevima;

22) municija za vatreno oružje je cjelovit metak koji sjedinjuje čahuru, kapislu, barutno punjenje i zrno ili sačmu. Ne smatra se municijom metak bez zrna, kugle ili sačme, punjenje za industrijske naprave i naprave za ubijanje stoke i metak za gasno, odnosno signalno oružje;

23) vlasnik oružja je fizičko i pravno lice koji posjeduje registrovano oružje;

24) ovlašteni trgovac oružjem je pravno i fizičko lice koje se bavi prometom oružja i municije na osnovu registracije i odobrenja nadležnog organa;

25) korisnik oružja je lice kojem je oružje povjereno za vrijeme izvršenja službenih poslova i član domaće i inostrane lovačke organizacije kome je dano na poslugu lovačko oružje i municija;

26) zajednički korisnici oružja su lica koja koriste jedno isto lovačko ili sportsko oružje.

Pojam i vrste oružja

Član 3.

Oružjem, u smislu ovog zakona, smatra se:

- 1) vatreno oružje;
- 2) vazdušno oružje;
- 3) gasno oružje i oružje za signalizaciju;
- 4) rasprskavajuće oružje;
- 5) hladno oružje;

Oružjem se smatraju i naprave koje su ovim zakonom utvrđene kao oružje kao i glavni dijelovi oružja.

Vatreno oružje

Član 4.

Vatreno oružje su sve vrste pušaka, pištolja i revolvera, kao i sve vrste naprava iz kojih se pomoću potisnutog djelovanja barutnih gasova izbacuje kroz cijev zrno, kugla, sačma, strelica ili drugi projektil.

Vatreno oružje iz stava 1. ovog člana je kratko ili dugo vatreno oružje koje može biti s repetirajućim mehanizmom, poluautomatsko ili automatsko.

Vazdušno oružje

Član 5.

Vazdušno oružje su sve vrste pušaka, pištolja, revolvera i druge naprave koje snagom pritiska vazduha ili drugog gasa izbacuju kroz cijev zrno, kuglicu ili druge projekte.

Gasno oružje i oružje za signalizaciju

Član 6.

Gasno oružje i oružje za signalizaciju su pištolji, revolveri i puške koji pod pritiskom barutnih gasova raspršuju neškodljive nadražujuće materije sa kratkotrajnim dejstvom i ispaljuju punjenje namijenjeno isključivo izazivanju glasnog pucnja ili ispaljivanju svjetleće signalne rakete.

Neškodljivim nadražujućim materijama, u smislu stava 1. ovog člana, smatraju se hemijski spojevi CN (kloracetofenon), CS (ortoklorbenzen-malon-dinitril) i OC (oleoresin capsicum).

Rasprskavajuće oružje

Član 7.

Rasprskavajuće oružje su sve vrste bombi, mina, granata i drugih naprava opremljene eksplozivnom materijom ili detonatorom (težina, udar, potez, trenje, hemijska reakcija, električna energija i sl.), uslijed čega dolazi do oslobađanja energije i njihovog rasprskavanja.

Hladno oružje

Član 8.

Hladno oružje su bodeži, kame, mačevi, sablje, bajuneti, bokseri i drugi predmeti kojima je osnovna namjena napad ili prouzrokovanje opasnosti ili predmeti pogodni za nanošenje povreda kada se nose na javnim okupljanjima i sličnim mjestima.

Glavni dijelovi oružja

Član 9.

Glavni dijelovi oružja su: cijevi za puške, pištolje i revolvere, ulošci (adapteri) za vatreno oružje, zatvarači za puške i pištolje, cilindri revolvera, navlake pištolja, sanduk ili okvir i kundak puške, koji su označeni fabričkim ili serijskim brojem.

Razvrstavanje oružja prema namjeni i posebnim vrstama

Član 10.

Prema namjeni i posebnim vrstama oružje se dijeli na:

- 1) oružje za ličnu zaštitu;
- 2) lovačko oružje;
- 3) sportsko oružje;
- 4) trofejno oružje;
- 5) staro oružje;
- 6) kombinovano oružje.

II. NABAVKA, DRŽANJE, NOŠENJE ORUŽJA I MUNICIJE I SAKUPLJANJE ORUŽJA

A. Nabavka oružja

Oružje čija je nabavka, držanje, nošenje, popravljavanje, prepravljavanje, promet i prevoz zabranjeno

Član 11.

Zabranjena je nabavka, držanje, nošenje, popravljavanje, prepravljavanje, promet i prevoz, ako ovim zakonom nije drukčije određeno, sljedećih vrsta oružja i municije:

- 1) vatrenog oružja bez utisnog žiga ili serijskog broja.
- 2) svih vrsta automatskog oružja;
- 3) dugog poluautomatskog oružja sa kapacitetom magacina većim od pet metaka;
- 4) svih vrsta oružja sa integralnim prigušivačem, prigušivača namijenjenih oružju i dijelova za prigušivače;
- 5) teleskopskih nišana sa svjetlosnim snopom ili sa uređajem za elektronsko pojačavanje svjetlosti ili infracrvenih uređaja;
- 6) oružja koje je namijenjeno izbacivanju eksplozivnih projektila;
- 7) oružja koje ima oblik predmeta druge namjene, tako da po svom spoljnjem izgledu nije prepoznatljivo kao oružje;
- 8) rasprskavajućeg oružja;

9) municije čija je osnovna namjena probijanje oklopa, municije sa eksplozivnim, zapaljivim ili otrovnim projektilima;

10) municije za koju nije pribavljeno odobrenje za stavljanje u promet prema odredbama posebnih propisa;

11) bodeža-skakavca čije se sječivo nalazi pod pritiskom sabijene opruge, a iz drške iskače pritiskom na dugme ili polugu, boksera i metalnih zvjezdica.

Ministarstvo može propisati zabranu nabavke, držanja, nošenja, popravljavanja i prepravljavanja, prevoza ili stavljanja u promet i drugog oružja, ako to zahtijevaju posebni razlozi sigurnosti ili zaštita javnog poretka.

Oružje u slobodnoj nabavci i bez obaveze prijavljivanja

Član 12.

Fizička lica starija od 18 godina života mogu bez odobrenja i prijave nabavljati:

1) gasno i oružje za signalizaciju, lukove, samostrele sa silom natege manjom od 45 kg, sprejeve koji raspršuju neškodljive nadražujuće materije, naprave namijenjene spašavanju, naprave za ubijanje stoke i druge slične naprave namijenjene za industrijske ili tehničke svrhe, ako su nabavljeni u skladu s propisima;

2) oružje koje se nabavlja i drži kao suvenir i reprodukcija oružja koje služi u dekorativne svrhe iz kojih se ne može ispaljivati metak ili se ne mogu preinačiti za ispaljivanje metaka;

3) imitacije oružja i predmete namijenjene za igru iz kojih se mogu ispaljivati samo meci koji ne postižu veću kinetičku energiju od 0,5 džula, čepovi koji uzrokuju prasak i sl.;

4) podvodne puške i druge predmete koji snagom opruge, napete gume ili gasa pod pritiskom izbacuju osti ili harpun koji su isključivo namijenjeni ribolovu (podvodno oružje).

5) vazdušno oružje.

Nabavka oružja sa omamljujućom materijom

Član 13.

Nabavka vatrenog oružja sa projektilom punjenim omamljujućom materijom, radi privremenog omamljivanja životinja, može se odobriti naučnim institucijama, državnim organima i drugim pravnim i fizičkim licima radi naučnog istraživanja i prikupljanja stručnih podataka o životinjskim vrstama, zaštite životinja,

kao i u drugim opravdanim slučajevima kada je to neophodno za obavljanje redovne djelatnosti.

Odobrenje za nabavku oružja

Član 14.

Vatreno oružje i samostreli sa silom natege većom od 45 kg mogu se nabavljati isključivo na osnovu odobrenja.

Odobrenje iz stava 1. ovog člana izdaje nadležna policijska uprava ministarstva unutrašnjih poslova (u daljem tekstu: nadležni organ).

Načelnik nadležne policijske uprave će formirati komisiju od najmanje tri člana koja će cijiniti opravdanost zahtjeva za izdavanje odobrenja iz stava 1. ovog člana.

Zahtjev za izdavanje odobrenja za nabavku oružja podnosi se policijskoj stanici prema mjestu prebivališta podnosioca zahtjeva.

Obrazac zahtjeva iz stava 3. ovog člana propisuje ministar unutrašnjih poslova na prijedlog policijskog komesara.

Uslovi za izdavanje odobrenja za nabavku oružja fizičkom licu

Član 15.

Odobrenje za nabavku oružja može se izdati fizičkom licu koje ispunjava sljedeće uslove:

1) da je navršilo 18 godina života;

2) da nije osuđeno za krivično djelo ili da se protiv lica ne vodi krivični postupak ili istraga za krivično djelo, osim za krivična djela protiv sigurnosti javnog saobraćaja propisana krivičnim zakonom F BiH;

3) da nije kažnjeno za prekršaj protiv javnog reda i mira koji ima obilježje nasilja ili za prekršaj propisan ovim zakonom, ako je za taj prekršaj pored novčane kazne propisana i zaštitna mjera oduzimanja oružja odnosno da se protiv lica ne vodi prekršajni postupak za takav prekršaj;

4) da ne postoje druge okolnosti koje ukazuju da bi oružje moglo biti zloupotrijebljeno, a posebno: češće i prekomjerno uživanje alkohola; teže poremećeni porodični odnosi, komšijski odnosi ili odnosi na radnom mjestu; disciplinske povrede propisa o lovu ili sportskom streljaštvu i sl.;

5) da ima opravdani razlog za nabavku oružja;

6) da je na zdravstvenom pregledu utvrđeno da je zdravstveno sposoban za držanje i nošenje oružja

7) da je obučeno u rukovanju oružjem i da poznaje propise koji se odnose na držanje i nošenje oružja.

Nakon zaprimanja zahtjeva za izdavanje odobrenja za nabavku oružja nadležni organ će utvrditi da li su ispunjeni uslovi iz stava 1. tačka 1. do 5. ovog člana.

Nadležni organ zatražit će od podnosioca zahtjeva koji ispunjava uslove iz stava 1. tačka 1. do 5. ovog člana da u roku od 30 dana od dana podnošenja zahtjeva, dostavi dokaze o ispunjavanju uslova iz stava 1. tačka 6. i 7. ovog člana.

Fizičkom licu može se odobriti nabavka najviše dva komada vatrenog oružja za ličnu zaštitu koji ne mogu biti iste vrste i kalibra.

Opravedani razlog za nabavku oružja

Član 16.

Smatra se da fizičko lice ima opravdan razlog za nabavku oružja:

- 1) ako mu je oružje potrebno za ličnu zaštitu;
- 2) ako se bavi lovom;
- 3) ako se bavi sportskim streljaštvom.

U svrhu lične zaštite može se odobriti nabavka samo oružja za samoodbranu i to zbog prirode posla koji podnosilac zahtjeva obavlja, češćeg uznemiravanja i ozbiljnih prijetnji napadom na život i tijelo od strane trećih lica ili zbog drugih opravdanih razloga.

Uvjerjenje o zdravstvenoj sposobnosti

Član 17.

Postojanje uslova iz člana 15. stav 1. tačke 6. ovog zakona dokazuje se uvjerenjem o zdravstvenoj sposobnosti.

Uvjerjenje o zdravstvenoj sposobnosti za držanje ili držanje i nošenje oružja izdaje ovlaštena zdravstvena ustanova.

Bliže uslove koje moraju ispunjavati zdravstvene ustanove koje će obavljati zdravstvene preglede kojima se utvrđuje zdravstvena sposobnost za držanje ili držanje i nošenje oružja, način i postupak obavljanja zdravstvenih pregleda, popis bolesti i zdravstvenih stanja koja lice čine nepodobnim za držanje i nošenje oružja, način vođenja evidencije i medicinske dokumentacije i sadržaj uvjerenja o izvršenom zdravstvenom pregledu kao i naknade u vezi s utvrđivanjem zdravstvene sposobnosti propisuje ministar unutrašnjih poslova u saradnji sa ministrom zdravstva.

Uvjerjenje o obučenosti u rukovanju oružjem

Član 18.

Postojanje uslova iz člana 15. stav 1. tačke 7. ovog zakona dokazuje se:

1) za sportsko oružje - uvjerenjem sportske streljačke organizacije o aktivnom članstvu u sportskoj streljačkoj organizaciji;

2) za kratko vatreno oružje i lovačko oružje-uvjerenjem o osposobljenosti za držanje i nošenje i pravilnu upotrebu oružja koje izdaje uprava policije ministarstva unutrašnjih poslova ili pravno lice koje je registrovano za obavljanje ove djelatnosti.

Program i način provođenja osposobljavanja iz stava 1. tačke 2. ovog člana propisuje ministar unutrašnjih poslova na prijedlog policijskog komesara.

Odobrenje za nabavku oružja pravnim licima radi obavljanja djelatnosti

Član 19.

Odobrenje za nabavku vatrenog oružja može se izdati pravnim licima koji obavljaju poslove zaštite ljudi i imovine putem osnivanja posebnih agencija ili putem organiziranja unutrašnje službe zaštite u pravnom licu, u skladu s posebnim zakonom, pravnim licima koja obavljaju poslove zaštite i čuvanja lovišta i šumskih gazdinstva, lovačkim i streljačkim organizacijama kao i drugim pravnim licima radi obavljanja djelatnosti, ako imaju osiguran prostor za siguran smještaj i čuvanje oružja.

Organizacija koja upravlja lovištem može radi odstrela divljači, članovima domaćih i inostranih lovačkih organizacija koje imaju dozvolu za lov dati na posluđu lovačko oružje i municiju za određeno vrijeme i u određenom lovištu.

Članovi inostranih lovačkih organizacija mogu oružje koje je njihovo vlasništvo, a koje su radi lova unijeli u državu Bosnu i Hercegovinu dati na čuvanje pravnom licu iz stava 2. ovog člana na osnovu pisanog ugovora, na rok do jedne godine od dana predaje oružja na čuvanje.

Po isteku roka iz stava 3. ovog člana zaključit će se novi ugovor o čuvanju oružja.

Važenje odobrenja za nabavku oružja

Član 20.

Odobrenje za nabavku oružja izdaje se sa rokom važnosti od šest mjeseci od dana izdavanja.

Odobrenje za nabavku oružja koje nije iskorišteno u roku iz stava 1. ovog člana mora se vratiti nadležnom organu u roku od osam dana od dana isteka roka.

Odbijanje zahtjeva za izdavanje odobrenja

Član 21.

Nadležni organ će rješenjem odbiti zahtjev za izdavanje odobrenja za nabavku oružja, ako podnosilac zahtjeva ne ispunjava uslove za nabavku oružja propisane ovim zakonom.

Protiv rješenja kojim je odbijen zahtjev za izdavanje odobrenja iz stava 1. ovog člana može se u roku od 15 dana od dana prijema rješenja izjaviti žalba upravi policije ministarstva unutrašnjih poslova (u daljem tekstu: uprava policije).

Rješenje donijeto po žalbi je konačno u upravnom postupku i protiv njega se ne može voditi upravni spor.

Nabavka municije

Član 22.

Municiju za vatreno oružje fizička lica mogu nabaviti na osnovu oružnog lista, a pravna lica na osnovu odobrenja za držanje oružja, ako ovim zakonom nije drukčije određeno.

Registracija oružja i isprave o oružju

Član 23.

Za oružje koje je nabavljeno na osnovu odobrenja fizička i pravna lica dužna su da, u roku od osam dana od dana nabavke oružja, podnesu zahtjev nadležnom organu za njegovu registraciju.

Fizičkom licu se izdaje oružni list, a pravnim licima odobrenje za držanje oružja.

Obrazac oružnog lista i odobrenja za držanje oružja propisuje ministar unutrašnjih poslova na prijedlog policijskog komesara.

B. Držanje i nošenje oružja

Oružni list

Član 24.

Oružni list za držanje oružja izdaje se:

- 1) fizičkom licu koje posjeduje oružje za ličnu zaštitu;
- 2) vlasniku trofejnog oružja.

Oružni list za držanje i nošenje oružja izdaje se fizičkom licu radi bavljenja streljaštvom i lovom.

Izuzetno oružni list za držanje i nošenje oružja može se izdati fizičkom licu koje oružje posjeduje za ličnu zaštitu, ako zbog prirode posla koji obavlja

ili drugih opravdanih razloga, postoji potreba za nošenjem oružja izvan stambenog prostora na kojem ima pravo vlasništva ili korištenja.

Oružni list se izdaje na ime vlasnika.

Za jedno isto lovačko i sportsko oružje može se izdati oružni list za najviše tri lica (zajednički korisnici oružja).

Važenje oružnog lista

Član 25.

Oružni list se izdaje sa rokom važenja od pet godina.

Važenje oružnog lista može se, na zahtjev podnosioca, produžiti za naredni period od pet godina.

Nadležni organ neće produžiti rok važenja oružnog lista, ako podnosilac zahtjeva ne ispunjava uslove iz člana 15. stav 1. tačka 2. do 6. ovog zakona.

Važenje oružnog lista za držanje trofejnog oružja

Član 26.

Oružni list za držanje trofejnog oružja izdaje se na neograničeno vrijeme.

Oružni list iz stava 1. ovog člana neće se izdati licu kada se u postupku registracije utvrdi postojanje razloga za odbijanje zahtjeva za nabavku oružja iz ovog zakona.

Odbijanje zahtjeva za izdavanje oružnog lista

Član 27.

Nadležni organ će rješenjem odbiti zahtjev za izdavanje oružnog lista, ako je podnosilac zahtjeva nabavio oružje nakon isteka roka iz člana 20. ovog zakona, kao i u slučaju kada su u postupku registracije utvrdi da je nastupio neki od razloga iz člana 15. ovog Zakona.

U slučaju iz stava 1. ovog člana oduzet će se oružje i odobrenje za nabavku oružja i postupiti u skladu sa članom 54. ovog Zakona.

Nadležni organ će odbiti zahtjev za izdavanje oružnog lista i za oružje za koje se ne može dokazati porijeklo.

Oružje iz stava 3. ovog člana oduzet će se bez naknade.

Protiv rješenja iz stava 2. prethodnog člana i stava 1., 2. i 3. ovog člana može se u roku od 15 dana od dana prijema rješenja izjaviti žalba upravi policije.

Rješenje donijeto po žalbi je konačno u upravnom postupku i protiv njega se ne može voditi upravni spor.

Dozvola za nošenje i prenošenje oružja**Član 28.**

Pravna lica koja obavljaju poslove zaštite, čuvanja lovišta i šumskih gazdinstva, lovačke i streljačke organizacije kao i druga pravna lica, koja posjeduju oružje na osnovu odobrenja za držanje oružja smiju ga radi obavljanja poslova za koje su registrovana dati na korištenje samo fizičkim licima koja ispunjavaju uslove propisane članom 15. ovog zakona, osim u slučajevima kada su uslovi za nošenje oružja propisani posebnim zakonom.

Pravna lica iz stava 1. ovog člana smiju ovlastiti fizička lica da radi obavljanja poslova za koje su registrovana mogu oružje nositi i prenositi od sjedišta pravnog lica do područja ili prostora koje se čuva, odnosno štiti.

Pravna lica iz stava 1. i 2. ovog člana dužna su fizičkom licu kojem povjeravaju oružje izdati dozvolu za nošenje i prenošenje oružja i o tome obavijestiti nadležni organ.

Sadržaj i izgled obrasca dozvole za nošenje i prenošenje oružja propisuje ministar unutrašnjih poslova na prijedlog policijskog komesara.

Na zahtjev ovlaštenog službenog lica nadležnog organa, lice koje nosi ili prenosi oružje dužno je da pokaže dozvolu.

Izdavanje dozvole iz stava 3. ovog člana nije obavezno ukoliko je nošenje i prenošenje oružja iz stava 1. i 2. regulisano posebnim zakonom.

C. Sakupljanje oružja**Sakupljanje starog oružja****Član 29.**

Fizičko lice može, bez odobrenja nadležnog organa, nabavljati, sakupljati i držati najviše do tri primjerka starog oružja.

Za nabavku, držanje i sakupljanje više od tri primjerka starog oružja potrebno je odobrenje za sakupljanje starog oružja.

Odobrenje za sakupljanje oružja iz stava 2. ovog člana izdaje nadležni organ licu koje ispunjava uslove iz člana 15. stav 1. tačka 1. do 5. ovog zakona i ima prostor za siguran smještaj i čuvanje sakupljenog oružja.

Sakupljanje automatskog i poluautomatskog oružja**Član 30.**

Fizičko lice kojem je izdano odobrenje za sakupljanje oružja može, pored starog oružja,

sakupljati i hladno oružje, automatsko i poluautomatsko oružje koje više nije u naoružanju oružanih snaga ili policije, a trajno je onesposobljeno za upotrebu.

Oružje je trajno onesposobljeno za upotrebu, ako su trajno zatvoreni cijev cijelom svojom dužinom ili ležište metka.

Kod oružja kod kojeg se cijev može zamijeniti bez upotrebe alata, cijev se mora trajno zatvoriti i povezati sa kućištem.

Zabrana upotrebe i nošenja starog oružja**Član 31.**

Staro oružje i oružje koje se drži na osnovu odobrenja za sakupljanje oružja ne može se nositi, upotrebljavati, niti za njega nabavljati, držati ili praviti municija.

Vatreno oružje koje je onesposobljeno za upotrebu, u smislu člana 30. stav 2. ovog zakona, ne smije se osposobljavati za upotrebu.

Oružje iz člana 30. stav 1. ovog zakona može se prodati ili predati samo licima kojima je izdano odobrenje za sakupljanje oružja.

Nabavka i držanje oružja od strane pravnih i fizičkih lica iz oblasti kulture**Član 32.**

Pravna i fizička lica koja se bave snimanjem filmova ili prikazivanjem pozorišnih predstava i muzeji mogu nabavljati i držati staro oružje, lovačko, sportsko i oružje iz člana 11. stav 1 tačka 1. i 2. ovog zakona, koje je prepravljeno tako da može ispaljivati samo lažnu municiju, ako ispunjavaju uslove iz člana 30. i 31. stav 1. i 2. ovog zakona.

III. NAČIN POSTUPANJA SA ORUŽJEM I MUNICIJOM**Pravila rukovanja oružjem****Član 33.**

Vlasnik, odnosno korisnik oružja dužan je da pravilno i oprezno rukuje sa oružjem, da se stara da oružje bude u ispravnom stanju i da osigura da ne bude dostupno maloljetnom ili drugom neovlaštenom licu.

Vlasnik oružja dužan je da na poziv nadležnog organa donese oružje na pregled.

Oružje se ne smije nositi bez odgovarajuće isprave o oružju i isprave o identitetu lica.

Korištenje i upotreba oružja**Član 34.**

Lovačko oružje ne može se upotrebljavati van lovišta, strelišta ili drugih mjesta koja su određena za vježbe gađanja.

Sportsko oružje se ne smije upotrebljavati van strelišta ili drugih mjesta koja su određena za vježbe gađanja.

Izuzetno od stava 1. ovog člana, vazdušno oružje i luk mogu se upotrebljavati van strelišta ili u ne naseljenom mjestu, ako se time ne ugrožava život ljudi i imovina.

Djeca starija od 12 godina života mogu koristiti vazdušno oružje i luk na strelštima i na drugim mjestima određenim i uređenim za vježbe gađanja, samo pod nadzorom ovlaštenog trenera.

Van lovišta, strelišta ili drugog mjesta određenog za vježbanje ili takmičenje u gađanju, dugo lovačko i sportsko oružje mogu se nositi samo u navlakama-futrolama ili kovčezima ne napunjeno, a kratko lovačko i sportsko oružje zaključano u navlakama ili kovčezima u kojima se ne smije nalaziti municija.

Dozvola za prenošenje streljačkog oružja**Član 35.**

Streljačke organizacije mogu davati na korištenje oružje i municiju samo članovima streljačkih organizacija za vrijeme dok se bave gađanjem na strelištu, a za prijenos oružja i municije do strelišta izdaju dozvolu licu koje prenosi oružje.

Zabrana nošenja oružja na javnom mjestu**Član 36.**

Zabranjeno je nošenje oružja na javnom mjestu.

Javno mjesto, u smislu ovog zakona, je mjesto na kojem je svakom slobodan pristup (ulica, trg, javni put, pristanište, plaža, park, čekaonica, trgovinski, ugostiteljski ili sličan objekt) ili pristup pod određenim uslovima (sportski objekt, kino ili pozorišna dvorana, sredstvo javnog saobraćaja, izložbena prostorija i sl.), kao i drugo mjesto određeno da služi za ovakve namjene (mjesto na kome se održava javni skup, sportska ili druga priredba i sl.).

Javnim mjestom, u smislu ovog zakona, smatra se i svako drugo mjesto na kojem je izvršen prekršaj, a posljedica je nastupila na javnom mjestu.

Zabrana nošenja i prenošenja oružja van stambenog ili poslovnog prostora**Član 37.**

Vlasnik koji posjeduje oružje na osnovu oružnog lista za držanje oružja ne smije takvo oružje nositi van stambenog prostora.

Izuzetno od stava 1. ovog člana, vlasnici koji posjeduju oružje na osnovu oružnog lista za držanje oružja smiju prenositi oružje samo radi popravljavanja ili prepravljavanja i korištenja na strelištu, nenapunjeno i u rastavljenom stanju tako da jedan ili više dijelova oružja iz člana 9. ovog zakona budu odvojeni od njega, a oružje čije rastavljanje nije moguće mora biti na drugi način onesposobljeno za trenutnu upotrebu (nošenje u futroli, bravica na obaraču i sl.).

Davanje oružja na poslugu**Član 38.**

Vlasnik oružja ne smije davati oružje na poslugu drugim licima.

Izuzetno od stava 1. ovog člana, vlasnik lovačkog ili sportskog oružja može dati na poslugu takvo oružje licu kome je za tu vrstu oružja izdat oružni list.

Čuvanje oružja i municije**Član 39.**

Oružje i municija čuvaju se na način da budu osigurani od svake zloupotrebe, odnosno zaključani i odvojeni, osim ako se čuvaju u metalnom ormaru, sefu ili sličnom spremištu koje se ne može otvoriti alatom uobičajene upotrebe.

Oružje i municija moraju se čuvati u stambenom ili poslovnom prostoru koji se nalazi u mjestu prebivališta, odnosno sjedišta vlasnika, odnosno korisnika oružja i municije.

Predaja oružja na čuvanje**Član 40.**

Vlasnik oružja koji napušta mjesto prebivališta duže od tri mjeseca, a oružje i municiju koji se prema ovom zakonu mogu držati na osnovu oružnog lista ne nosi sa sobom, dužan je da ih preda na čuvanje licu koje ima pravo držanja takvog oružja.

Vlasnik oružja dužan je da, u slučaju iz stava 1. ovog člana, o predaji oružja i municije na čuvanje obavijesti nadležni organ u roku od osam dana od dana predaje.

Nadležni organ izdat će potvrdu o prijemu obavještenja iz stava 2. ovog člana.

Lice kome je predano oružje na čuvanje dužno je da ga vrati vlasniku nakon njegovog povratka u mjesto prebivališta.

Gubitak i krađa oružja

Član 41.

Vlasnik oružja dužan je da odmah, a najkasnije u roku od osam dana, prijaviti gubitak ili krađu oružja.

Prijava iz stava 1. ovog člana podnosi se nadležnom organu prema mjestu događaja ili saznanja o gubitku ili krađi oružja.

Postupak sa nađenim oružjem

Član 42.

Nađeno oružje prijavljuje se nadležnom organu u roku od 48 sati.

Ukoliko se vlasnik nađenog oružja ne pronađe u roku od jedne godine, nadležni organ će postupiti na način propisan članom 55. ovog zakona.

Promjena prebivališta i sjedišta

Član 43.

Kada lice kome je izdana isprava o oružju promijeni prebivalište dužno je da, u roku od 15 dana po dolasku u novo mjesto prebivališta, odnosno sjedišta, prijavi oružje nadležnom organu radi registracije.

Obaveze vlasnika oružja u vezi s prenosom vlasništva

Član 44.

Vlasnik oružja kojem je izdat oružni list odnosno odobrenje za držanje oružja može prenijeti pravo vlasništva na vatreno oružje licu koje ima odobrenje za nabavku te vrste i kalibra oružja.

Vlasnik oružja koji je prenio pravo vlasništva na lice iz stava 1. ovog člana dužan je u roku od osam dana od dana prodaje, objavit i oružje kod nadležnog organa i izvršiti predaju oružnog lista odnosno odobrenja za držanje oružja.

Postupak sa oružjem u slučaju smrti vlasnika

Član 45.

Bračni drug, odnosno punoljetni član uže porodice ili drugo lice koje je živjelo u zajedničkom domaćinstvu sa umrlim vlasnikom oružja, dužno je da u roku od 30 dana, a na poziv nadležnog organa i prije tog roka, preda oružje i municiju nadležnom organu.

O predanom oružju nadležni organ izdaje potvrdu.

Nasljedniku oružja može se, na njegov zahtjev, izdati oružni list za držanje oružja, ukoliko ispunjava uslove iz člana 15. stav 1. ovog zakona.

IV. ODUZIMANJE ORUŽJA, MUNICIJE I ISPRAVA O ORUŽJU

Razlozi za oduzimanje oružja, municije i isprava o oružju

Član 46.

Nadležni organ oduzet će oružje, municiju i isprave o oružju ako nastupi koji od slučajeva iz člana 15. stav 1. tačka 2. 3. 4. 5. i 6. ovog zakona.

U slučajevima iz člana 15. stav 1. tačka 2. 3. 4. i 6. ovog zakona može se oduzeti i trofejno oružje kao i upotrebljivo staro vatreno oružje.

Upućivanje na vanredni zdravstveni pregled

Član 47.

Nadležni organ će uputiti na vanredni zdravstveni pregled vlasnika, odnosno korisnika oružja za koga se opravdano sumnja da zbog zdravstvenih razloga više nije sposoban za držanje oružja.

U slučaju iz stava 1. ovog člana vlasnik odnosno korisnik oružja dužan je da u roku od 60 dana od dana upućivanja na zdravstveni pregled, dostavi nadležnom organu uvjerenje o zdravstvenoj sposobnosti.

Od vlasnika odnosno korisnika oružja za koga je na zdravstvenom pregledu utvrđeno da je nesposoban za držanje oružja ili koji ne dostavi uvjerenje o zdravstvenoj sposobnosti za držanje oružja u roku iz stava 2. ovog člana nadležni organ će rješenjem oduzeti oružje, municiju i isprave o oružju.

Oduzimanje oružja zbog neblagovremenog podnošenja zahtjeva

Član 48.

Ako lice kojem je izdato odobrenje za nabavljanje oružja ne podnese blagovremeno zahtjev za izdavanje oružnog lista nadležni organ će rješenjem oduzeti oružje i postupiti na način propisan članom 54. ovog zakona.

Na način iz prethodnog stava nadležni organ će postupiti i ako nasljednik iz člana 45. ovog zakona ne podnese zahtjev za izdavanje oružnog lista u roku od 60 dana od završetka ostavinskog postupka ili ako je takav zahtjev odbijen.

Oduzimanje dotrajalog oružja**Član 49.**

Kada se u postupku produženja oružnog lista, odnosno odobrenja za držanje oružja pregledom utvrdi da je oružje dotrajalo u tolikoj mjeri da njegova upotreba može ugroziti sigurnost ljudi, a ne postoji mogućnost popravke, rješenjem će se oduzeti oružje i oružni list, odnosno odobrenje za držanje oružja.

Za oduzeto oružje vlasniku ne pripada naknada.

Oduzimanje oružja zbog nelegalnog posjedovanja**Član 50.**

Nadležni organ oduzeće oružje i municiju od pojedinca, državnih organa i drugih pravnih lica koji nabave oružje ili municiju bez propisanog odobrenja za nabavljanje ili drže oružje bez oružnog lista odnosno bez propisanog odobrenja za držanje oružja, ukoliko o postupanju s tim oružjem nije pravomoćno odlučeno u sudskom postupku.

Privremeno oduzimanje oružja, municije i isprava o oružju**Član 51.**

Oružje, municija i isprave o oružju mogu se privremeno oduzeti i prije okončanja postupka, ako to nalažu posebni razlozi sigurnosti i zaštite javnog reda i mira i sigurnosti građana ili se radi o poduzimanju hitnih mjera koje se ne mogu odlagati, a postojanje činjenica na kojima se zasniva rješenje je utvrđeno ili su učinjene vjerovatnim.

Nadležni organ će izdati potvrdu o oduzetom oružju, municiji i ispravama o oružju.

Čuvanje oduzetog oružja i municije**Član 52.**

Oduzeto oružje i municija iz stava 1. prethodnog člana čuvaju se kod nadležnog organa koji je izvršio oduzimanje.

Rješenje o oduzimanju oružja, municije i isprava o oružju**Član 53.**

Rješenje o oduzimanju oružja, municije i isprava o oružju donosi nadležni organ.

Protiv rješenja iz stava 1. ovog člana može se u roku od 15 dana od dana prijema rješenja izjaviti žalba upravi policije.

Žalba ne odlaže izvršenje rješenja.

Rješenje donijeto po žalbi je konačno u upravnom postupku i protiv njega se ne može voditi upravni spor.

Prodaja i predaja oduzetog oružja i municije**Član 54.**

Po pravosnažnosti rješenja o oduzimanju oružja i municije nadležni organ će pozvati vlasnika da u roku od dva mjeseca, otuđi oduzeto oružje i municiju, odnosno da sam nađe kupca ili ga proda posredstvom ovlaštenog trgovca oružjem.

Ako vlasnik oduzetog oružja i municije ne proda ili ne preda oružje i municiju u roku iz stava 1. ovog člana, nadležni organ će predati oružje i municiju ovlaštenom trgovcu oružjem, radi prodaje.

Oružje i municija iz stava 2. ovog člana mogu biti izloženi prodaji najviše tri mjeseca od dana predaje ovlaštenom trgovcu oružjem.

Za prodano oružje i municiju vlasniku oružja i municije pripada naknada u iznosu koji je ugovorio sa ovlaštenim trgovcem oružja.

Ako ovlašteni trgovac oružjem ne proda oružje i municiju iz stava 3. ovog člana, vratit će ih nadležnom organu.

Raspolaganje oružjem i municijom koji su oduzeti bez prava na naknadu**Član 55.**

Oružje i municija koji su oduzeti shodno odredbama člana 42., 50. i 54. stav 5. ovog zakona, nadležni organ će dostaviti upravi policije na dalje raspolaganje.

O načinu raspolaganja oružjem i municijom odlučuje uprava policije na prijedlog posebne komisije.

Nadležnost komisije iz stava 2. ovog člana kao i njezin sastav te način rada određuje policijski komesar.

Za oružje i municiju iz stava 1. ovog člana vlasniku ne pripada naknada.

V. POPRAVLJANJE I PREPRAVLJANJE ORUŽJA**Pojam i uslovi koje moraju ispunjavati pravna lica registrovana za obavljanje djelatnosti popravljnja i prepravljnja oružja****Član 56.**

Pod popravljnjem oružja smatra se otklanjanje kvarova na oružju i zamjena ili ugradnja originalnih dijelova.

Pod prepravljanjem oružja smatra se skraćivanje oružja, prilagođavanje oružja drugoj municiji, zamjena ili ugradnja ne originalnih važnih dijelova oružja i drugih zahvata na oružju kojima se utiče na njegovo funkcionisanje ili na tehničke karakteristike.

Popravljanjem i prepravljanjem oružja mogu se baviti pravna lica koja su registrovana za obavljanje ove djelatnosti i koja za obavljanje djelatnosti dobiju potrebno odobrenje.

Odobrenje iz stava 3. ovog člana izdaje nadležni organ.

Zahtjev za izdavanje odobrenja iz stava 4. ovog člana podnosi se policijskoj stanici prema mjestu sjedišta pravnog lica.

U pravnom licu iz stava 2. ovog člana može se popravljati i prepravljati samo oružje za koje je izdano odobrenje za nabavljanje oružja, oružni list ili odobrenje za držanje oružja.

Popravljanje i prepravljanje oružja može obavljati samo lice koje ispunjava uslove iz člana 15. stav 1. ovog zakona.

Obavezno ispitivanje i označavanje oružja

Član 57.

Prepravljeno oružje podliježe obaveznom ispitivanju i označavanju žigom.

Pravno lice koje je oružje prepravilo promjenom kalibra, tehničkih ili balističkih karakteristika je dužan da, u roku od osam dana od dana prepravljanja oružja, o tome obavijesti nadležni organ.

Zabrana nošenja oružja koje se popravlja i prepravlja

Član 58.

Oružje koje je primljeno radi popravljanja ili prepravljanja ne smije se nositi van prostorija određenih za rad do njegove predaje vlasniku, osim ako je to potrebno radi popravke, prepravke ili ispitivanja oružja.

U svrhu ispitivanja karakteristika popravljenog ili prepravljeno oružja, pravna lica registrovana za obavljanje takve djelatnosti mogu nabavljati i držati potrebne vrste i količine municije na osnovu odobrenja za nabavku municije.

VI. PROMET ORUŽJA I MUNICIJE

Odobrenje za promet oružja i municije

Član 59.

Prometom oružja i municije, u smislu ovog zakona, smatra se nabavka oružja i municije radi

prodaje, smještaja i čuvanja i njihova prodaja na veliko i malo.

Prometom oružja i municije mogu se baviti pravna lica i fizička lica koja su registrovana za obavljanje takve djelatnosti i koja za obavljanje djelatnosti dobiju potrebno odobrenje.

Odobrenje iz stava 2. ovog člana izdaje nadležni organ.

Zahtjev za izdavanje odobrenja iz stava 3. ovog člana podnosi se policijskoj stanici prema mjestu sjedišta pravnog lica.

U pravnom licu iz stava 2. ovog člana poslove prometa može obavljati samo fizičko lice koje ispunjava uslove iz člana 15. stav 1. ovog zakona.

Obaveze ovlaštenog trgovca oružjem

Član 60.

Ovlašteni trgovci oružjem i municijom mogu prodavati oružje i municiju samo licima koja prema odredbama ovog zakona imaju odobrenje za nabavljane oružja

Ovlašteni trgovci oružjem i municijom dužni su da prilikom prodaje oružja i municije zadrže jedan primjerak odobrenja za nabavljanje oružja i municije a na drugi primjerak stave zabilješku o izvršenoj prodaji i ovjere je štambiljem i potpisom odgovornog lica i o prodaji oružja i municije obavijeste nadležni organ iz člana 14. stav 2. ovog zakona, najkasnije u roku od osam dana od dana prodaje.

Poslovni prostor u kojem će se obavljati promet oružja i municije kao i magacini u kojima se drži oružje i municija za promet na veliko, moraju ispunjavati uslove koji su posebnim zakonom i propisima donesenim na osnovu tog zakona utvrđeni za posebne tehničke i prostorne uslove kao i smještaj i čuvanje eksplozivnih materija.

VII. PREVOZ ORUŽJA I MUNICIJE

Odobrenje za prevoz oružja i municije

Član 61.

Pod prevozom oružja i municije, u smislu ovog zakona, smatra se transport oružja i municije od pošiljaoca do primaoca.

Za prevoz oružja i municije potrebno je odobrenje.

Odobrenje iz stava 2. ovog člana izdaje nadležna policijska uprava s čijeg područja započinje prevoz.

Za oružje u slobodnoj nabavci i bez obaveze prijavljivanja, u smislu člana 12. ovog zakona, nije potrebno odobrenje za prevoz.

Shodna primjena propisa

Član 62.

Na prevoz oružja i municije na odgovarajući način se primjenjuju propisi o prevozu opasnih materija.

VIII. STRELIŠTA

Pojam strelišta

Član 63.

Strelište je objekt namijenjen za sportsko-rekreativno bavljenje streljaštvom, koji ispunjava propisane tehničke i sigurnosne uslove u skladu sa posebnim propisima.

Pravna lica mogu početi sa obavljanjem djelatnosti iz stava 1. ovog člana kad dobiju odobrenje nadležnog organa.

Odredbe člana 59. i 60. ovog zakona primjenjuju se na odgovarajući način i na strelišta.

Rukovanje oružjem na strelištu

Član 64.

Vatreno oružje na strelištu mogu koristiti samo fizička lica kojima je izdat oružni list radi bavljenja streljaštvom.

Fizičko lice koje ne ispunjava uslove iz stava 1. ovog člana gađanje može izvoditi samo pod nadzorom ovlaštenog lica strelišta.

Ovlašteno lice strelišta zabranit će izvođenje gađanja i pristup licima iz stava 1. i 2. ovog člana, ako su pod dejstvom alkohola, narkotika ili drugih psihoaktivnih materija ili ako njihovo psihofizičko stanje ukazuje na nesposobnost rukovanja oružjem.

Oružjem i municijom na strelištu neposredno mogu rukovati lica koja ispunjavaju uslove iz člana 15. stav 1. ovog zakona.

Nabavka oružja i municije radi korištenja na strelištu

Član 65.

Pravna lica iz člana 63. stav 2. ovog zakona mogu nabavljati potrebne količine oružja i municije radi korištenja na strelištu.

U slučaju iz stava 1. ovog člana može se zavisno od mogućnosti smještaja i količine potrošene municije, izdati odobrenje za višekratnu nabavku municije sa rokom važenja do jedne godine.

IX. NADZOR I EVIDENCIJE

Nadzor

Član 66.

Neposredni nadzor nad provođenjem ovog zakona vrši uprava policije ministarstva unutrašnjih poslova.

Vođenje evidencija

Član 67.

Nadležni organ vodi evidencije o:

- izdanim odobrenjima za nabavku oružja i municije;
- izdanim oružnim listovima;
- izdanim odobrenjima za držanje oružja;
- izdanim odobrenjima za sakupljanje oružja;
- oduzetom, nađenom i predanom oružju;
- kao i druge evidencije propisane ovim zakonom.

Vrste evidencija

Član 68.

Streljačke i lovačke organizacije i druga pravna lica koji su oružje i municiju nabavile radi obavljanja svoje djelatnosti dužne su o tom oružju i municiji te oružju i municiji koju daju na korištenje voditi evidenciju.

Pored evidencija iz stava 1. ovog člana evidenciju su dužna voditi i pravna lica registrovana za obavljanje djelatnosti prometa i popravljavanja i prepravljavanja oružja i municije i to:

- o nabavljenom oružju i municiji;
- o prodanom oružju i municiji;
- o popravljenom i prepravljenom oružju.

Lica kojima je izdano odobrenje za sakupljanje oružja dužni su voditi evidenciju o sakupljenom oružju.

Obrazac evidencija

Član 69.

Obrazac i način vođenja evidencija iz člana 67. i 68. ovog zakona propisuje ministar unutrašnjih poslova na prijedlog policijskog komesara.

X. KAZNE NE ODREDBE

Prekršaji

Član 70.

Novčanom kaznom od 200,00 KM do 500,00 KM kaznit će se za prekršaj fizičko lice, koje:

- 1) u propisanom roku ne vrati neiskorišteno odobrenje za nabavku oružja (član 20. stav 2.);

2) u propisanom roku ne podnese zahtjev za registraciju oružja (član 23. stav 1.);

3) ne produži važnost oružnog lista (član 25. stav 2.);

4) drži više od tri primjerka starog oružja ili sakuplja oružje bez odobrenja (član 29. stav 2.);

5) oružje iz člana 31. stav 3. ovog Zakona proda ili preda licu koje nema odobrenje za sakupljanje oružja;

6) ne održava oružje u ispravnom stanju ili ne poduzima mjere osiguranja da oružje ne bude dostupno maloljetnom ili drugom neovlaštenom licu (član 33. stav 1.);

7) ne donese na pregled oružje po pozivu nadležnog organa (član 33. stav 2.);

8) nosi oružje bez odgovarajuće isprave o oružju i isprave o identitetu lica (član 33. stav 3.);

9) oružje ili municiju ne čuva u skladu sa članom 39. ovog Zakona;

10) ne preda na čuvanje oružje licu koje ima pravo držanja ili nošenja oružja (član 40. stav 1.);

11) u propisanom roku ne obavijesti nadležni organ o predaji na čuvanje oružja i municije (član 40. stav 2.);

12) ne vrati vlasniku oružje predano na čuvanje po njegovom povratku u mjesto prebivališta (član 40. stav 4.);

13) ne prijavi gubitak ili krađu oružja (član 41.);

14) postupi protivno odredbi člana 43. ovog Zakona;

15) u propisanom roku prodano oružje ne odjavi kod nadležnog organa (član 44. stav 2.);

16) u propisanom roku nadležnom organu ne preda oružje nakon smrti vlasnika oružja (član 45. stav 1.).

Za prekršaj iz stava 1. tačke 4. ovog člana izreći će se i zaštitna mjera oduzimanja oružja.

Za prekršaje iz stava 1. tačke 3., 6., 7., 9., 10. i 14. ovog člana može se izreći i zaštitna mjera oduzimanja oružja i municije i isprava o oružju.

Član 71.

Novčanom kaznom od 400,00 KM do 800,00 KM, kaznit će se za prekršaj pravno i fizičko lice, koje:

1) je od pravnog lica iz člana 28. stav 1. ovlašteno da nosi i prenosi oružje, a postupi protivno odredbi člana 28. stav 2. i 4.;

2) upotrebljava lovačko, sportsko i vazdušno oružje i luk van mjesta koja su određena za vježbe

gađanja, odnosno na mjestima koja su po svom položaju ili po poduzetim mjerama takva da se može ugroziti sigurnost ljudi (član 34. stav 1., 2. i 3.);

3) vazdušno oružje ili luk da na korištenje djeci mlađoj od 12 godina života van sportskih strelišta ili mjesta određenih ili uređenih za vježbanje gađanja i bez nadzora ovlaštenog trenera (član 34. stav 4.);

4) lovačko i sportsko oružje prenosi suprotno članu 34. stav 5. ovog Zakona;

5) oružje i municiju sportske streljačke organizacije nosi bez dozvole streljačke organizacije (član 35. stav 1.);

6) nosi oružje protivno odredbama člana 36.;

7) nosi oružje, koje posjeduje na osnovu oružnog lista za držanje oružja, van stambenog prostora (član 37. stav 1.);

8) da na poslugu oružje suprotno odredbama člana 38. ovog Zakona.

Za prekršaj iz stava 1. tačke 6., 7. i 8. ovog člana izreći će se i zaštitna mjera oduzimanja oružja i municije i isprava o oružju.

Za prekršaj iz stava 1. tačke 2., 3., 4. i 5. može se izreći i zaštitna mjera oduzimanja oružja i isprava o oružju.

Član 72.

Novčanom kaznom od 700,00 - 1200,00 KM kaznit će se za prekršaj fizičko lice, a pravno lice i fizičko lice registrirano za obavljanje prometa oružja i municije kaznit će se novčanom kaznom od 1.000,00 - 5.000,00 KM koje:

1) nabavi, drži, popravlja, prepravlja, vrši promet i prijevoz oružja u municije čija je nabavka zabranjena (član 11.);

2) nabavi oružje za privremeno omamljivanje životinja suprotno članu 13. ovog Zakona;

3) bez odobrenja nabavi i drži oružje čiju nabavku je potrebno odobrenje (član 14. stav 1.);

4) nabavi ili drži municiju za oružje za čiju nabavku je potrebno odobrenje za držanje ili oružni list (član 22.);

5) daje na upotrebu oružje licima koja ne ispunjavaju uslove iz člana 15. ovog Zakona;

6) osposobi za upotrebu onesposobljeno vatreno oružje (član 31. stav 2.);

7) neovlašteno popravlja ili prepravlja oružje (član 56. stav 3.);

8) povjeri neposredno rukovanje oružjem koje se popravlja i prepravlja licu koje ne ispunjava uslove (član 56. stav 6.);

9) prepravljeno oružje ne preda na ispitivanje i označavanje žigom, odnosno primi na popravak ili prepravak neregistrovano oružje (član 56. stav 5. i član 57. stav 1.);

10) u propisanom roku ne obavijesti o prepravci oružja nadležni organ (član 57. stav 2.);

11) se neovlašteno bavi prometom oružja i municije (član 59. stav 2.);

12) povjeri neposredno rukovanje oružjem i municijom u prometu licu koje ne ispunjava uslove (član 59. stav 4., a u vezi sa članom 60.);

13) proda oružje ili municiju licu koje nema odobrenje za nabavku oružja ili oružni list (član 60. stav 1.);

14) u propisanom roku ne obavijesti nadležni organ o prodaji oružja (član 60. stav 2.);

15) ne postupi u skladu sa obavezama iz člana 60. stav 3.;

16) prevozi oružje bez odobrenja (član 61. stav 2.);

17) neovlašteno obavlja streljačku djelatnost (član 63. stav 2.);

18) postupi suprotno odredbi člana 64. ovog Zakona;

19) ne vodi evidencije iz člana 68. ovog Zakona.

Za prekršaje iz stava 1. ovog člana kaznit će se novčanom kaznom u iznosu od 300 - 500 KM odgovorno lice u pravnom licu.

Za prekršaje iz stava 1. tačke 1., 2., 3., 4., 5. i 6. izreći će se i zaštitna mjera oduzimanja oružja i municije.

Za prekršaje iz stava 1. tačka 8., 9., 12., 13. i 18. uz novčanu kaznu izreći će se i zaštitna mjera zabrane obavljanja djelatnosti prometa, popravljavanja i prepravljavanja oružja ili otvaranja strelišta.

XI. PRELAZNE I ZAVRŠNE ODREDBE

Predaja oružja

Član 73.

Vlasnici koji posjeduju oružje čija je nabavka, držanje i nošenje po ovom zakonu zabranjena obavezni su to oružje i municiju da predaju nadležnom organu, najkasnije u roku od jedne godine od dana stupanja na snagu ovog zakona.

Protiv lica koje postupi prema stavu 1. ovog člana neće se voditi krivični, niti prekršajni postupak.

Predano oružje će se uništiti.

Predaja oružja koje se ne smije posjedovati

Član 74.

Pravna lica koja radi obavljanja poslova iz svoje djelatnosti posjeduju oružje koje po ovom zakonu ne smiju da posjeduju obavezni su da ga predaju nadležnom organu, u roku od tri mjeseca od dana stupanja na snagu ovog zakona.

Oružje iz stava 1. ovog člana, koje nije predano u roku iz stava 1. ovog člana, nadležni organ će oduzeti bez naknade.

Važenje izdanih isprava o oružju

Član 75.

Oružni listovi za držanje i nošenje oružja, odobrenja za držanje oružja i odobrenja za držanje trofejnog oružja, izdani prije stupanja na snagu ovog zakona, važe dvanaest mjeseci od dana stupanja na snagu ovog zakona kao isprave kojima se utvrđuje pravo na držanje i nošenje oružja.

Oružni listovi za držanje i nošenje lovačkog i sportskog oružja, izdati prije stupanja na snagu ovog zakona, važe dvanaest mjeseci od dana stupanja na snagu ovog zakona kao isprave kojima je utvrđeno pravo na držanje i nošenje tog oružja samo na lovištu i strelištu.

Do isteka roka iz stava 1. i 2. ovog člana, nadležni organ će, na zahtjev vlasnika oružja, zamijeniti isprave o oružju, i to:

- oružni list za držanje i nošenje oružja, oružnim listom za držanje oružja za ličnu zaštitu ili oružnim listom za držanje i nošenje oružja za ličnu zaštitu;
- odobrenje za držanje trofejnog oružja, oružnim listom za držanje trofejnog oružja;
- oružni list za držanje i nošenje lovačkog i sportskog oružja, oružnim listom za držanje i nošenje tog oružja.

Nakon isteka roka iz stava 1. i 2. ovog člana isprave o oružju će se izdavati na način i pod uslovima iz članova 15. do 17. ovog zakona.

Rješavanje po započetim postupcima

Član 76.

Postupci započeti prije stupanja na snagu ovog zakona okončat će se po ranijem zakonu.

Donošenje podzakonskih propisa

Član 77.

Podzakonske propise za provođenje ovog zakona, donijet će ministar unutrašnjih poslova u

roku od šest mjeseci od dana stupanja na snagu ovog zakona.

Prestanak primjene dosadašnjeg zakona

Član 78.

Do donošenja podzakonskih akata iz člana 77. ovog zakona primjenjivat će se Zakon o nabavljanju, držanju i nošenju oružja i municije ("Službeni list SR BiH", br. 42/90., i "Sl. list RBiH", br. 13/93. i 13/94).

Nakon isteka roka iz stava 1. ovog člana prestaje primjena dosadašnjeg zakona.

Stupanje na snagu zakona

Član 79.

Ovaj zakon stupa na snagu osmog dana od dana objavljivanja u "Službenom glasniku Unsko-sanskog kantona".

Broj 01-02-1-39/07	Predsjedavajući Skupštine
12. juna 2007. godine	Unsko-sanskog kantona
B i h a ć	Admir Hadžipašić , dipl. pravnik

190.

Na osnovu poglavlja IV član 1. V.A.2.11.b) Ustava Unsko-sanskog kantona - prečišćeni tekst ("Službeni glasnik Unsko-sanskog kantona", broj 1/04 i 11/04), Skupština Unsko-sanskog kantona, na 7. sjednici održanoj 12.6.2007.godine, donijela je

ZAKON

O IZMJENAMA ZAKONA O PLAĆAMA, NAKNADAMA I NOVČANIM PRIMANJIMA POSLANIKA U SKUPŠTINI UNSKO-SANSKOG KANTONA I NOSILACA IZVRŠNIH I DRUGIH FUNKCIJA U VLADI UNSKO-SANSKOG KANTONA

Član 1.

U Zakonu o plaćama, naknadama i novčanim primanjima poslanika u Skupštini Unsko-sanskog kantona i nosilaca izvršnih i drugih funkcija u Vladi Unsko-sanskog kantona ("Službeni glasnik Unsko-sanskog kantona" broj 6/04 i 3/07), član 5. se mijenja i glasi:

"Koeficijenti za plaće iz člana 4. ovog zakona utvrđuju se u slijedećim vrijednostima:

- a) poslanici:
 - predsjedavajući-a Skupštine20,00
 - zamjenici predsjedavajućeg Skupštine15,00
 - poslanici na stalnom radu13,50

b) nosioci izvršnih i drugih funkcija u Vladi Kantona:

- premijer Kantona20,00
- ministri u Vladi Kantona17,00

c) nosioci drugih funkcija

- savjetnici premijera12,50

Član 2.

Koeficijenti iz člana 1. ovog Zakona primjenjivat će se za obračun plaće počev od 1. maja 2007. godine.

Član 3.

Ovaj Zakon stupa na snagu narednog dana od dana objavljivanja u "Službenom glasniku Unsko-sanskog kantona".

Broj 01-02-1-40/07	Predsjedavajući Skupštine
12. juna 2007. godine	Unsko-sanskog kantona
B i h a ć	Admir Hadžipašić , dipl. pravnik

191.

Na osnovu člana 11 n) glava V A 2 Ustava Unsko-sanskog kantona - prečišćeni tekst ("Službeni glasnik Unsko-sanskog kantona", broj 1/04), Skupština Unsko-sanskog kantona, na 7. sjednici održanoj 12.6.2007. godine, donijela je

KODEKS

PONAŠANJA POSLANIKA U SKUPŠTINI UNSKO-SANSKOG KANTONA

I. PREDMET

Predmet Kodeksa

Član 1.

Predmet ovog kodeksa je da precizira standarde ponašanja koji se očekuju od izabranih poslanika Skupštine Unsko-sanskog kantona u obavljanju njihovih dužnosti i da obavijesti građane o standardima ponašanja koje oni imaju pravo da očekuju od svojih poslanika.

Definicija izabranog predstavnika

Član 2.

U smislu ovog kodeksa, termin "poslanik" označava lice koje ima mandat u Skupštini Unsko-sanskog kantona dobijen na neposrednim ili posrednim izborima.

Definicija funkcije**Član 3.**

U smislu ovog kodeksa, termin "funkcija" označava neposredni ili izborni mandat i sve odgovornosti koje obavlja poslanik sa takvim mandatom.

II. OPĆI PRINCIPI**Primat zakona i općeg interesa****Član 4.**

Poslanici obavljaju dužnost i koriste svoja prava u skladu sa Ustavom, zakonom, Poslovnikom Skupštine i ovim Kodeksom.

Ciljevi obavljanja funkcije**Član 5.**

Poslanici će obavljati svoje funkcije savjesno, uz otvorenost i spremnost da odgovaraju za svoje odluke i ponašanje.

Ograničenje u vršenju funkcije**Član 6.**

U vršenju svojih funkcija, poslanici će poštovati prava i ovlašćenja svih drugih izabranih političkih predstavnika i svih državnih službenika i namještenika. Oni neće ohrabrivati, niti pomagati drugim političkim predstavnicima ili bilo kom državnom službeniku da prilikom vršenja svojih funkcija krši principe uspostavljene ovim kodeksom.

III. POSEBNE OBAVEZE**Pravila koja vladaju u izbornoj kampanji****Član 7.**

Izborna kampanja kandidata imaće za cilj da pruži informacije i objašnjenja o njihovim političkim programima.

Kandidati neće težiti da pribave glasove birača na bilo koji drugi način osim ubjedljivom argumentacijom i diskusijom, a posebno, neće pokušavati da pribave glasove time što će klevetati druge kandidate, koristiti nasilje i/ili prijetnje, zloupotrebljavati biračke spiskove i/ili rezultate glasanja i pružati i obećavati usluge.

Zabrana favorizovanja**Član 8.**

Poslanici neće vršiti svoje funkcije odnosno neće koristiti ovlašćenja svog položaja u cilju ostvarivanja privatnog interesa pojedinaca ili

grupa pojedinaca, a radi postizanja svoje direktne ili indirektne lične koristi.

Zabrana vršenja vlasti u vlastitu korist**Član 9.**

Poslanici neće vršiti svoje funkcije odnosno koristiti ovlašćenja svog položaja u cilju ostvarivanja svojih vlastitih, direktnih ili indirektnih, privatnih ili ličnih interesa.

Sukob interesa**Član 10.**

Poslanici će se uzdržati od bilo kakve izjave ili glasanja o pitanjima u vezi s kojima imaju neposredan ili posredan lični interes.

Ograničenje istovremenog obavljanja dvije ili više funkcija**Član 11.**

Poslanici će se povinovati svim važećim propisima koji ograničavaju istovremeno obavljanje dvije ili više političkih funkcija.

Poslanici neće obavljati druge političke funkcije koje bi ih ometale u obavljanju njihovih funkcija kao izabranih predstavnika.

Oni neće obavljati funkcije, imati izborne mandate, zanimanja ili službene dužnosti koje obuhvataju nadzor nad njihovim vlastitim funkcijama kao izabranih predstavnika ili koje su oni sami dužni da nadziru u svojstvu izabranih predstavnika.

Vršenje diskrecionih ovlasti**Član 12.**

U vršenju diskrecione ovlasti, poslanici neće sebi pružati bilo kakvu direktnu ili indirektnu ličnu prednost, ili davati prednost bilo kom pojedincu ili grupi pojedinaca, sa ciljem ostvarivanja direktne ili indirektne lične koristi od toga.

Za svaku odluku, oni će davati iscrpno obrazloženje, uz navođenje svih činjenica na kojima je ta odluka zasnovana, a posebno - koja pravila i propisi su primjenjeni, uz ukazivanje na to da odluka udovoljava tim pravilima i propisima.

U nedostatku pravila i propisa, obrazloženje odluke će obuhvatiti elemente kao što su ukazivanje na njenu uravnoteženost, pravičnost i saglasnost sa opštim interesom.

Zabrana korupcije**Član 13.**

Poslanici će se u obavljanju svojih funkcija uzdržati od bilo kakvog ponašanja koje bi, po važećem domaćem ili međunarodnom krivičnom zakonodavstvu, moglo da se okarakterise kao korupcionaštvo.

Pridržavanje budžetske i finansijske discipline**Član 14.**

Poslanici će se pridržavati budžetske i finansijske discipline koja obezbjeđuje ispravno upravljanje javnim prihodima, na način regulisan važećim zakonodavstvom.

U obavljanju svojih dužnosti, poslanici neće učiniti ništa čime bi pronevjerili budžetska sredstva i/ili donacije. Oni neće preduzimati ništa što bi moglo dovesti do toga da se budžetska sredstva i/ili donacije koriste direktno ili indirektno u lične svrhe.

Zabrana obezbjeđivanja određenih službi i poslova**Član 15.**

Prilikom obavljanja svojih funkcija, poslanici neće poduzimati mjere kojima bi sebi obezbjedili buduće lične i profesionalne prednosti po prestanku obavljanja funkcije, i to:

- u državnim institucijama ili privatnim firmama nad kojima su vršili nadzor za vrijeme obavljanja svojih funkcija;
- u državnim institucijama ili privatnim firmama sa kojima su uspostavili ugovorne odnose za vrijeme obavljanja svojih funkcija;
- u državnim institucijama ili privatnim firmama osnovanim za vrijeme njihovog mandata, a na osnovu vlasti koja im je povjerena.

IV. SREDSTVA NADZORA**Ograničavanje i objavljivanje iznosa troškova predizborne kampanje****Član 16.**

Kandidati će troškove svoje predizborne kampanje držati u srazmjeru i u okviru razumnih granica. Oni će se uredno pridržavati svih zahtjeva, predviđenih važećim propisima, koji podrazumijevaju da izvor i iznos sredstava namijenjenih za finansiranje kampanje, kao i priroda i visina utrošenih sredstava, budu objavljeni.

U nedostatku važećih propisa u ovoj oblasti, oni će, ukoliko se to od njih zahtijeva, pružiti ove informacije.

Deklaracija interesa**Član 17.**

Poslanici će se uredno pridržavati svih zahtjeva, predviđenih važećim propisima, koji znače da njihov direktan ili indirektan lični interes, ostali mandati, funkcije ili zanimanja promjene u njihovoj imovini, budu objavljeni ili kontrolisani. U nedostatku propisa u ovoj oblasti, oni će, ukoliko se to od njih zahtijeva, pružiti ove informacije.

Saglasnost sa unutrašnjim i vanjskim mjerama nadzora**Član 18.**

U obavljanju svojih funkcija, poslanici neće ometati primjenu bilo kakve mjere nadzora koju bi na osnovu svojih legitimnih prava odlučili da primjene organi unutrašnje ili vanjske kontrole.

Oni će se uredno pridržavati svake privremene ili konačne odluke tih organa.

U obrazloženjima svojih postupaka i odluka koje predstavljaju predmet nadzora, oni će izričito pomenuti postojanje mjera nadzora i navesti organe nadležne za njihovu primjenu.

V. ODNOSI SA JAVNOŠĆU**Objavljivanje i obrazloženje odluka****Član 19.**

Poslanici će biti odgovorni građanima Unsko-sanskog kantona za vrijeme svog mandata.

Poslanici će detaljno obrazložiti svaku odluku koju donesu, navodeći sve činioce na kojima je odluka zasnovana, a posebno pravila i propise koji su primjenjeni i ukazujući na to u kom smislu je ta odluka u skladu sa tim pravilima i propisima. U slučaju kada je takva informacija povjerljiva, razlozi za to će biti objašnjeni.

Poslanici će uredno odgovarati na bilo koji javno izrečeni zahtjev koji se odnosi na obavljanje njihovih funkcija, obrazloženje njihovih postupaka ili funkcionisanje službi i organa za čiji rad oni snose odgovornost.

Oni će podržavati i podsticati sve postupke i mjere koje znače transparentnost u vršenju njihove funkcije i u funkcionisanju službi i organa za čiji rad su odgovorni.

ZAKLJUČAK

I

Usvaja se Program rada Javnog preduzeća Radio-televizije Unsko-sanskog kantona za 2007.godinu.

II

Ovaj Zaključak objavit će se u "Službenom glasniku Unsko-sanskog kantona".

Broj 01-02-4-44/07
12. juna 2007. godine
B i h a ć

Predsjedavajući Skupštine
Unsko-sanskog kantona
Admir Hadžipašić, dipl. pravnik

194.

Na osnovu člana 95. Poslovnika Skupštine Unsko-sanskog kantona ("Službeni glasnik Unsko-sanskog kantona", br. 5/04), Skupština Unsko-sanskog kantona, na 7. sjednici održanoj 12. juna 2007. godine, donijela je slijedeći

ZAKLJUČAK

I

Usvaja se Izvještaj o radu Javnog preduzeća
"Unsko-sanske novine" d.o.o. Bihać za 2006.
godinu.

II

Ovaj Zaključak objavit će se u "Službenom glasniku Unsko-sanskog kantona".

Broj 01-02-4-45/07
12. juna 2007. godine
B i h a ć

Predsjedavajući Skupštine
Unsko-sanskog kantona
Admir Hadžipašić, dipl. pravnik

195.

Na osnovu člana 95. Poslovnika Skupštine Unsko-sanskog kantona ("Službeni glasnik Unsko-sanskog kantona", br. 5/04), Skupština Unsko-sanskog kantona, na 7. sjednici održanoj 12. juna 2007. godine, donijela je slijedeći

ZAKLJUČAK

I

Usvaja se Plan i Program Javnog preduzeća
"Unsko-sanske novine" d.o.o. Bihać za 2007.
godinu.

II

Ovaj Zaključak objavit će se u "Službenom glasniku Unsko-sanskog kantona".

Broj 01-02-4-46/07
12. juna 2007. godine
Bihać

Predsjedavajući Skupštine
Unsko-sanskog kantona
Admir Hadžipašić, dipl. pravnik

196.

Na osnovu člana 95. Poslovnika Skupštine Unsko-sanskog kantona ("Službeni glasnik Unsko-sanskog kantona", br. 5/04), Skupština Unsko-sanskog kantona, na 7. sjednici održanoj 12. juna 2007. godine, donijela je slijedeći

ZAKLJUČAK

I

Usvaja se Izvještaj o radu JU Spomen-
-biblioteka "Skender Kulenović" Bosanski
Petrovac za 2006.godinu.

II

Ovaj Zaključak objavit će se u "Službenom glasniku Unsko-sanskog kantona".

Broj 01-02-4-47/07
12. juna 2007. godine
Bihać

Predsjedavajući Skupštine
Unsko-sanskog kantona
Admir Hadžipašić, dipl. pravnik

197.

Na osnovu člana 95. Poslovnika Skupštine Unsko-sanskog kantona ("Službeni glasnik Unsko-sanskog kantona", br. 5/04), Skupština Unsko-sanskog kantona, na 7. sjednici održanoj 12. juna 2007. godine, donijela je slijedeći

ZAKLJUČAK

I

Usvaja se Program rada JU Spomen-biblioteka "Skender Kulenović" Bosanski Petrovac za 2007.godinu.

II

Ovaj Zaključak će se objaviti u "Službenom glasniku Unsko-sanskog kantona".

Broj 01-02-4-48/07
12. juna 2007. godine
B i h a ć

Predsjedavajući Skupštine
Unsko-sanskog kantona
Admir Hadžipašić, dipl. pravnik

S A D R Ź A J

189. Zakon o oružju i municiji	405	191. Kodeks ponašanja poslanika	
190. Zakon o izmjenama Zakona o plaćama,		u Skupštini Unsko-sanskog kantona	419
naknadama i novčanim primanjima poslanika		192 - 197. Zaključci	422
u Skupštini Unsko-sanskog kantona i			
nosilaca izvršnih i drugih funkcija			
u Vladi Unsko-sanskog kantona	419		

OBAVJEŠTENJE

Obavještavamo pravna i fizička lica, dosadašnje pretplatnike, kao i lica koja žele da se pretplate za "Službeni glasnik Unsko-sanskog kantona" za ovu i narednu godinu, da godišnja pretplata iznosi 200,00 KM sa porezom, a može se izvršiti na račun broj 1290079402494455 u korist Budžeta USK-a, vrsta prihoda 722631, budžetska organizacija 2101001, identifikacijski broj 4263249630000.